





沈氏學發卷之二

構李 沈堯中



地理

地在天中

大九州

大五嶽

大四瀆

兩戒

崑崙

黃河原委

黃河九曲

江出吐谷渾

漢出徼外

海水不溢

潮汐

地中

中國五嶽

帝都

禹貢

周禮職方

春秋邦域

漢唐宋元疆域大明一統

水土風氣

洞天福地

天然

釋迦方域志序

地理

地在中

黃帝問于岐伯曰地之為下否乎岐伯曰地為人之下太虛之中者也帝曰憑乎岐伯曰大氣舉之也

大九州

帝王世紀曰天地開闢三皇尚矣神農之王天下東西九十萬里南北八十五萬里為大九州九州之內東南為神州時神農以耒耨之利教天下薄海內外罔有不耕是神農之教行也黃帝以來德不及遠惟于神州之內分為九州其去神農遠矣

大五嶽

今之所謂五嶽者嵩為中華為西岱為東恒為北衡為南此亦自中土言之所謂境內之名山也若論天下之大則當以崑崙為中崑崙外四面為四嶽道書東嶽廣桑山在東海南嶽長離山在南海西嶽麗農山在西海北嶽廣野山在北海中嶽崑崙崑崙山在四海之中此天地間之大五嶽也

大四瀆

瀆者獨也禹貢江淮河濟各自獨流以至于海故
爲四瀆然此亦自中土言之耳若論天下之大則
當以崑崙山頂阿耨池四面分流爲大四瀆一自
東北轉而東南入海今中國黃河是也一自東南
轉而西南入海一自西南轉而西北入海一自西
北轉而東北入海不在中國境內

兩戒

唐一行以爲天下山河之象存乎兩戒北戒自三
危積石負終南地絡之陰逾河並雷首底柱王屋
太行北抵常山之右乃東循塞垣至濊貊朝鮮是
謂北紀所以限戎狄也南戒自岷山蟠冢負地絡
之陽連商山熊耳外方桐柏自上絡南逾江漢攜
武當荆山至于衡陽乃東循嶺徼達東甌閩中是
謂南紀所以限蠻夷也故星傳謂北戒爲胡門南
戒爲越門河源自北紀之首循雍州北徼達華陽
而與地絡相會並行而東至太行之曲分而東流
與涇渭濟瀆相爲表裏謂之北河江源自南紀之
首循梁州南徼達華陽而與地絡相會並行而東
及荆山之陽分而東流與漢水淮瀆相爲表裏謂
之南河故于天象則弘農分陝爲兩河之會五服

諸侯在焉自陝而西爲秦涼北紀山河之曲爲晉
代南紀山河之曲爲巴蜀皆負險用武之國也自
陝而東三川中岳爲成周西距外方大伾北至於
濟南至于淮東達鉅野爲宋鄭陳蔡河內及濟水
之陽爲鄘衛漢東濱淮水之陰爲申隨皆四戰用
文之國也北紀之東至北河之北爲邢趙南紀之
東至南河之南爲荆楚自北河下流南距岱山爲
三齊夾右碣石爲北燕自南河下流北距岱山爲
鄒魯南涉江淮爲吳越皆負海之國貨殖之所阜
也自河源循塞垣北東及海爲戎狄自江源循嶺

徼南東及海爲蠻越觀兩河之象與雲漢之所始
終而分野可知矣于易五月一陰生而雲漢潛萌
于天稷之下進及井鉞間得坤維之氣陰始達于
地上而雲漢上升始交于列宿七緯之氣通矣東
井據百川上流故鶉首爲秦蜀墟得兩戒山河之
首雲漢達坤右而漸升始居列宿上觜觿參代皆
直天關表而在河陰故實沈下流得大梁距河稍
遠涉陰亦深故其分野自漳濱却負恒山居北紀
衆山之東南外接髦頭地皆河外陰國也十月陰
氣進踰乾維始上達于天雲漢至營室東壁間升

氣悉究與內規相接故自南正達于西正得雲漢
升氣爲山河上流自北正達于東正得雲漢降氣
爲山河下流颯訾在雲漢升降中居水行正位故
其分野當中州河濟間且王良閣道由紫垣絕漢
抵營室上帝離宮也內接成周河內皆豕韋分十
一月一陽生而雲漢漸降退及艮維始下接于地
至斗建間復與列舍氣通于易天地始交泰象也
踰析木津陰氣益降進及大辰升陽之氣究而雲
漢沉潛于東正之中故易雷出地曰豫雷出泉爲
解皆房心象也星紀得雲漢下流百川歸焉析木

爲雲漢末派山河極焉故其分野自南河下流窮
南紀之曲東南負海爲星紀自北河末派窮北紀
之曲東北負海爲析木負海者以其雲漢之陰也
唯姬訾內接紫宮在王畿河濟間降婁玄枵與山
河首尾相遠隣顓頊之墟故爲中國負海之國也
其地當南河之北北河之南界以岱宗至于東海
自鶉首踰河戒東曰鶉火得重離正位軒轅之祗
在焉其分野自河華之交東接祝融之墟北負河
南及漢蓋寒燠之所均也自析木紀天漢而南曰
大火得明堂升氣天市之都在焉其分野自鉅野

岱宗西至陳留北負河濟南及淮皆和氣之所布也陽氣自明堂漸升達于龍角曰壽星龍角謂之天關于易氣以陽決陰夫象也升陽進踰天關得純軋之位故鶉尾直建巳之月內列太微爲天廷其分野自南河以負海亦純陽地也壽星在天關內故其分野在商亳西南淮水之陰北連太室之東自陽城際之亦巽維地也夫雲漢自坤抵艮爲地紀北斗自軋攜巽爲天綱其分野與帝車相直皆五帝墟也寃咸池之政而在乾維內者降婁也故爲少昊之墟叶北宮之政而在乾維外者娥訾也故爲顓頊之墟咸攝提之政而在巽維內者壽星也故爲太昊之墟布太微之政而在巽維外者鶉尾也故爲列山氏之墟得四海中丞太階之政者軒轅也故爲有熊氏之墟木金得天地之微氣其神治于季月水火得天地之章氣其神治于孟月故章道存乎至微道存乎終皆陰陽變化之際也若微者沉潛而不及章者高明而過亢皆非上帝之居也斗杓謂之外廷陽精之所布也斗魁謂之會府陽精之所復也杓以治外故鶉尾爲南方負海之國魁以治內故娥訾爲中州四戰之國其

餘列舍在雲漢之陰者八爲負海之國在雲漢之陽者四爲四戰之國降婁玄枵以負東海其神主于岱宗歲星位焉星紀鶉尾以負南海其神主于衡山熒惑位焉鶉首實沈以負西海其神主于華山太白位焉大梁析木以負北海其辰主于恒山辰星位焉鶉火大火壽星豕韋爲中州其辰主于嵩丘鎮星位焉島夷蠻貊之人聲教所不暨皆係于狗國云此中國之論非通論也

崑崙

河圖篇崑崙者地之中也地下有八柱名山大川孔穴相通堪輿家海內山脉皆祖崑崙是也

黃河源委

桑欽水經云崑崙墟在西北去嵩山五萬里地之中也其高萬一千里河水出其東北陬屈其東南流入中國凡九曲其間伏見分合難以數計又中有底柱未有碣石及入海而潮汐日再至名爲滄河綿延固結其氣如此夏商周建都在河南北歷代久遠非偶然也

黃河九曲

河圖絳象云河始崑崙山名地首上爲權勢星一

曲也東流千里至規其山名地契上爲距樓星二
曲也邠南千里至積石山名地肩上爲別符星三
曲也又南千里入隴首間抵龍門首名地根上爲
營室星四曲也南流千里抵龍首至卷重山名地
咽上爲卷舌星五曲也東流貫砥柱觸闕流山名
地喉上爲樞星以運七政六曲也西距卷重山千
里東至雒會名地神上爲紀星七曲也東流至太
岷山名地肱上爲輔星八曲也東流過絳水千里
至大陸名地腹上爲虛星九曲也元學士潘昂霄
河源志黃河九折胡地有二折蓋乞兒馬出反必
赤里也與河圖經象合及據水經嵩山去崑崙五
萬里輿地圖中國僅有二折愚意元時所探河源
亦恐旣伏而見者非崑崙之本源也

江出吐谷渾

蔡松年補南北史志載吐谷渾酋長阿豺登其國
西疆山觀墊江源問其羣臣曰此水流更有何名
由何郡國入何水也其長史曾和曰此水經仇池
過晉壽出宕渠始號墊江至巴郡入江渡廣陵會
于海阿豺曰水尚知歸吾獨無所歸乎乃遣使南
通于劉宋貢方物宋少帝封爲澆河公按此事甚

奇阿豺夷狄之君能知問學而其臣曾和考據如
流何愧於中國之桑欽酈道元乎此所云墊江非
今忠州之墊江也古之墊江卽今合州也合州置
于西魏隋煬帝改合州爲涪陵而移墊江之名於
忠州之桂溪今之墊江則古之桂溪也近日一統
志亦殊草草混淆聊因書墊江源併及之

漢出徼外

祝穆曰天下之大川以漢名者二班固謂之東漢
西漢而黎州之漢水源於飛越嶺者不與焉固之
所謂東漢則禹貢之道漾自嶓冢山逕梁洋金房
均襄郢復至漢陽入江者也西漢則蘇代所謂漢
中之甲輕舟出于巴乘夏水下漢四日而至五渚
者其源出于西和州徼外經階沔與嘉陵水合俗
謂之西漢又經大安利劔果合與涪水合入于江
海水不溢

崑崙四面之水日注于海而海不溢先儒以爲如
沃焦釜非以往者之消爲來者之息不知崑崙上
有阿耨池實由四海之水滲縮而升所謂山澤通
氣也

潮汐

潮汐之說有謂隨地升降有謂日入于海相激而生有謂東海主月南海主長短星者夫地靜物本無升降日附天而行去海不知幾許安能激之東海潮常先南海潮常後隨月不與星合隨星不與月合均之非通論也及問海上人云北水南去則長南水北去則落又嶺外錄欽廣日止一潮瓊海半月東流半月西流竊嘗思之殆易所謂山澤通氣者與蓋天下之水盡出于崑崙頂之阿耨池阿耨池之水實由地下滲縮而升氣有呼吸水有盈縮崑崙去北近去南遠呼吸盈縮北海爲先東西

次之南又次之故東先而南後南北往來假道東

西故東西而南一潮至南而極落則東西兩下故

分流

所云各半月各流者蓋半月陽氣盛過西恒多落則牽西而東半月陰氣盛過東恒多落也此其原委灼然可據者如此

地中

周禮大司徒以土圭之法測土深正日景以求地中日南景短多暑日北景長多寒日東景夕多風日西景朝多陰日至之景尺有五寸謂之地中天之所合也四時之所交也風雨之所會也陰陽之所和也然則百物阜安乃建王國焉又典瑞士

圭以致日月封國則以土地玉人土圭尺有五寸
以致日以土地日南日之南也日北日之北也日
之東日過中而得午故曰景夕日之西日未中而
得午故曰景朝此博而求之也日至之景尺有五
寸謂之地中此約而取之也先儒皆以陽城爲地
中此日晷所照之中非天地之中也

中國五嶽

中國五嶽東嶽泰山羅浮括蒼爲佐命蒙山東山
爲佐理南嶽衡山霍山潛山爲儲副天台句曲爲
佐理中嶽嵩山少室武當爲佐命太和陸渾爲佐
理西嶽華山地肺女几爲佐命西城青城峨眉蟠
塚西玄戎山吳山爲佐理北嶽恒山河逢抱犢爲
佐命玄巖崆峒陽洛爲佐理又三佐命山青城山
天柱山廬山然此五嶽亦自黃帝以來所都言之
耳若周都鎬京則華山反在其東故後世有欲易
之者而卒不果行從來久遠未可輕議也

帝都

崑崙當天地之中中國在其東南帝王中天下而
立南面以朝諸侯獨雍爲最雄蓋地脉自崑崙而
來背負斗垣面拱七政東西北黃河如帶又天所

以限戎狄也河以外北有陰山西有賀蘭祁連東有偏頭鴈門實爲藩蔽河以內諸山輻輳沃野千里涇水北繞渭水南環左崑函右隴蜀古稱四塞之地天府之國周秦漢唐歷代因之良有以也我太祖初定金陵劉誠意議于鍾山之南此爲得之亦嘗命皇太子北巡關洛選擇形勝時無婁敬遂不果遷我

成祖起自燕京遂定鼎焉攷之千古黃帝都涿鹿堯都平陽舜都蒲坂皆在冀州其次洛陽得道里之中又其次汴梁但汴梁不以地爲險而以兵爲

險故宋京營兵號百餘萬皆仰給縣官勞費甚矣

禹貢

冀州三面距河兗河之西雍河之東豫河之北

濟河惟兗州兗州之域東南據濟西北距河

海岱惟青州青州之域東北至海西南距岱

海岱及淮惟徐州徐州之域東至海南至淮北至

岱

淮海惟揚州揚州之域北至淮東南至于海

荆及衡陽惟荊州荊州之域北距荆山南盡衡山之陽

荆河惟豫州豫州之域西南至荆山北距大河
華陽黑水惟梁州梁州之域東距華山之南西據
黑水

黑水西河惟雍州雍州之域西據黑水東距西河

周禮職方

職方氏掌天下之圖以掌天下之地辨其邦國都
鄙四夷八蠻七閩九貉五戎六狄之人民與其財
用九穀六畜之數要周知其利害乃辨九州之國
使同貫利東南曰揚州其山鎮曰會稽其澤藪曰
具區其川三江其浸五湖其利金錫竹箭其民二

男五女其畜宜鳥獸其穀宜稻正南曰荊州其山
鎮曰衡山其澤藪曰雲膏其川江漢其浸潁湛其
利丹銀齒革其民一男二女其畜宜鳥獸其穀宜
稻河南曰豫州其山鎮曰華山其澤藪曰圃田其
川滎雒其浸波澆其利林漆絲枲其民二男三女
其畜宜六擾其穀宜五種正東曰青州其山鎮曰
沂山其澤藪曰望諸其川淮泗其浸沂沐其利蒲
魚其民二男二女其畜宜鷄狗其穀宜稻麥河東
曰兖州其山鎮曰岱山其澤藪曰大野其川河汾
其浸盧維其利蒲魚其民二男三女其畜宜六擾

其穀宜四種正西曰雍州其山鎮曰嶽山其澤藪曰弦蒲其川涇汭其浸渭洛其利玉石其民三男二女其畜宜牛馬其穀宜黍稷東北曰幽州其山鎮曰醫無閭其澤藪曰貍養其川河泚其浸菑時其利魚鹽其民一男三女其畜宜四糧其穀宜三種河內曰冀州其山鎮曰霍山其澤藪曰楊紆其川漳其浸汾潞其利松柏其民五男三女其畜宜牛羊其穀宜黍稷正北曰并州其山鎮曰恒山其澤藪曰昭餘祁其川葭池區夷其浸涑易其利布帛其民二男三女其畜宜五糧其穀宜五種

春秋邦域

漢地理志畧言秦地於天官東并輿鬼之分野也於禹貢跨梁益二州於詩風兼秦豳兩國昔后稷封豳公劉遷豳太王徙岐文王作豐武王治鎬其民有先王遺風好稼穡本業故豳詩言農桑衣食之本甚備有鄠杜竹木南山檀栢之饒稱陸海爲九州膏腴秦人用之稱天府以并天下漢興立都長安徙齊諸田楚昭屈景及諸功臣家於長陵後世世徙吏二千石高貴富人及豪傑并兼之家於諸陵以彊幹弱支非獨爲奉山園也是故五方雜

厝風俗不純瀕南山近夏陽多阻險輕薄易爲盜
賊常爲天下劇又列侯貴人車服僭上無限度衆
庶放效俗以侈靡天水隴西山多林木民以板爲
屋及安定北地上郡西河皆迫近戎狄上氣力脩
習戰備以射獵爲先頗不恥寇盜詩曰在其板屋
又曰王于興師脩我戈矛及車轡小戎之篇皆言
車馬田狩之事武威以西本匈奴昆邪王休屠王
地武帝攘之初置四郡以通西域隔絕南羌匈奴
其水草宜畜牧故涼州之畜爲天下饒巴蜀廣漢
本南夷秦并爲郡土地肥美有江水沃野山林竹
木疏食果實之饒南賈滇爨僮西賈邛苻馬旄牛
民食稻魚亡凶年憂景武間文翁爲蜀守教民讀
書法令及司馬相如游宦京師以文辭顯於世鄉
黨慕循其迹後有王褒嚴遵楊雄之倫文章冠天
下武都地雜氐羗及犍爲牂牁越雋亦武帝所開
置也俗畧與巴蜀同而武都近天水俗頗似焉故
秦地天下三分之一而人衆不過什三其富居什
六季札觀秦樂曰此謂夏聲夏大也其周之舊乎
魏地觜觶參之分野也自高陵以來盡河東爲內
河內本殷之舊都周旣滅殷分其畿內爲三國詩

風邛鄘衛是也以封唐叔後懿公亡道為狄所滅
 更封于河南而河內殷墟更屬于晉河東土地平
 易有鹽鐵之饒本唐堯所居詩風唐魏之國也成
 王滅唐而封叔虞其民有先王遺教君子深思小
 人儉陋故唐詩蟋蟀山有樞葛生之篇皆思奢儉
 之中念死生之慮魏國亦姬姓也在晉之南河曲
 自唐叔去世獻公滅魏以封畢萬滅耿以封趙夙
 韓武又去世為韓魏趙所滅畢萬後徙大梁故魏
 一號為梁周地柳七星張之分野也周公營洛邑
 為土中平王東居東西長南北短短長相覆為千

里周人之失巧偽趨利貴財賤義高富下貧熹為
 商賈不好仕宦韓地角亢氐之分野也詩風陳鄭
 之國與韓同星分焉鄭今河南之新鄭本高辛氏
 火正祝融之墟也右雒左洧食溱洧焉土陜而險
 山居谷汲男女亟聚會故其俗淫後為韓滅陳國
 今睢陽之地本太昊之墟潁川南陽本夏禹之國
 夏尚忠其敝鄙朴秦既滅韓徙天下不軌之民於
 南陽故其俗夸奢上氣力好商賈漁獵臧匿難制
 御宛西通武關東受江淮亦一都會也趙地昂畢
 之分野也中山地薄人眾丈夫相聚游戲慷慨悲

歌起則椎剽掘冢作姦巧多弄物倡優女子彈絃

跼躑師古曰跼宅煩反躑與履同游媚富貴徧諸侯之後宮邯

鄲北通燕涿南有鄭衛漳河之間一都會也其地

土廣俗雜大率猜急高氣勢輕為姦太原上黨多

晉公族子孫以詐力相傾矜夸功名報仇過直嫁

娶送死奢靡漢興號為難治常擇嚴猛之將或任

殺伐為威父兄被誅子弟怨憤至訐告刺史二千

石或報殺其親屬鍾代石北迫近胡寇民俗懼伎

好氣為姦利不事農商自全晉時已患其剽悍而

武靈王又益厲之故冀州之部盜賊常為它州劇

而定襄雲中五原本戎狄地頗有趙齊韓楚之徒

民鄙朴少禮文好射獵於鴈門亦同俗於天文別

屬燕燕地尾箕之分野也武王定殷封召公于燕

東有漁陽右北平遼西遼東西有上谷代郡鴈門

南陽涿郡通齊趙渤海之間一都會也上谷至遼

東地廣民稀數被胡寇俗與趙代相類有漁鹽棗

栗之饒北際烏丸夫餘東賈真番之利玄菟樂浪

武帝時置齊地虛危之分野也其地本古爽鳩季

崩師古曰崩仕力反薄姑之國詩風齊國是也太公以其

地負海鳥鹵少五穀而人民寡迺勸以女工之業

通魚鹽之利而人物輻輳後十五世桓公用管仲
 設輕重以富國合諸侯成伯功故其俗彌侈織水
 統綺繡純麗之物以冠帶衣履天下夸奢朋黨言
 與行繆急之則離散緩之則放縱臨淄海岱之間
 一都會也其中具五民云魯地奎婁之分野也東
 至東海南有泗水周公子伯禽為魯侯其民有聖
 人之教化洙泗之瀕其民涉渡幼扶老而代其任
 俗既益薄長老不自安與幼少相讓故曰魯道衰
 洙泗之間斷斷如也師古曰斷斷分辨意孔子閔王道衰闕
 修六經述唐虞三代之道是以其民好學上禮義

重廉恥去聖久遠周公遺化銷微孔氏庠序衰壞
 地陜民衆頗有桑麻之業亡林澤之饒俗儉嗇愛
 財趨商賈好訾毀多巧偽喪祭之禮文備實寡然
 好學終愈於他俗宋地房心分壑也本陶唐氏火
 正闕伯之虛詩風曹國也昔堯作游成陽舜漁雷
 澤湯止亳故其民猶有先王遺風重厚多君子好
 穡惡衣食以致畜藏後為齊楚魏所滅衛地營室
 東壁之分野本顓頊之虛有桑間濮上之阻男女
 亦亟聚會聲色生焉故俗稱鄭衛之音周末有子
 路夏育民人慕之故其俗剛武上氣力漢興二千

石治者亦以殺戮爲威宣帝時韓延壽爲東郡太守崇禮義尊諫爭至今東郡號善爲吏則延壽之化也其失頗奢靡嫁娶送死過度而野王好氣任俠有濮上風楚地翼軫之分壑也有江漢川澤山林之饒火耕水耨民食魚稻以漁獵山伐爲業果蔬羸蛤食物常足故俗啻窳媮生而亡積聚飲食還給不憂凍餓亦亡千金之家信巫鬼重淫祀而漢中淫泆枝柱與巴蜀同俗汝南之別皆急疾有氣勢江陵故郢都西道巫巴東有雲夢之饒亦一都會也吳地斗分野也今之會稽九江丹陽豫章廬江廣陵六安臨淮盡吳分也壽春合肥受南北湖皮革鮑木之輸東有海鹽章山之銅三江五湖之利亦一都會也豫章出黃金然董董物之所有取之不足以更費江南地卑濕丈夫多天會稽海外有東鯤人分爲二十餘國粵地牽牛婺女之分野也近海多犀象毒冒珠璣銀銅果布之湊中國往賈者多取富焉番禺其一都會也自合浦徐聞南入海得大州東西南北方千里武帝畧以爲儋耳珠厓郡男子耕農種禾稻紵麻女子桑蠶織績亡馬與虎民有五畜山多麋鹿兵則矛盾刀斧木

弓弩竹矢或骨爲鏃自初爲郡縣吏卒中國人多
侵陵之故率數歲壹反元帝時遂罷棄之南有黃
支國民俗與珠厓相類

漢唐宋元疆域

漢輿地南置交趾北跨朔方西至燉煌東置樂浪
三代以來未之有也

唐輿地東至遼東西至交河南至日南北至陰山
南北如漢東不及西過之

宋輿地東南皆至于海西盡巴夔北際中山其燕
雲十六州自石晉棄與契丹之後終不可復宣和
中約金夾攻契丹取燕雲舊地甫三歲而禍變遽
作移蹕東南疆宇促矣

元起沙漠并西域平西夏滅女真臣高麗定南詔
遂下江南而天下爲一故其地北踰陰山西極流
沙東盡遼左南越海表東南所至不下漢唐而西
北則過之有難以里數計者矣

大明一統

國朝輿地東起遼陽西至嘉峪南濱海北連沙漠
道里縈紆各萬餘里偉哉盛矣說者猶以爲軼于
宋埒于唐不及于漢詎非以北失朔方西失燉煌

南失交趾東失遼水玄菟樂浪耶

成祖定鼎燕京燉煌交趾似在所緩遼左朔方方煩經畧耳

京師負重山面平陸地饒魚鹽穀馬果窳之利又轉漕東南財貨駢集天險地利足制諸胡汴洛中都江左皆不及也真定北至於永平昔爲內郡乃今居庸紫荆山海喜峰古北黃花鎮皆稱阨塞故漁陽保塞重兵屯焉廣平順德大名山東西腰膂南北舟車並集臨青天津海運故道遮洋餉舟下直沽至漁陽猶海運也河間真保多降胡性獷難

馴東安霸州武清而東野曠人稀凶徒伏匿迤山有樵牧之利姦人淵藪其中有司莫敢踪跡若乃水利不脩旱澇歲困田野不闢租徭日增馬牧不蠲坐糜財力貴游不戢兼併膏腴郵傳不節水陸繹騷關譏不嚴奸胡覘伺皆不可謂非急務也南京畿開基之地也勝勢在長江 太祖自上流和陽橫江渡克采石下太平三戰而入集慶 成祖出維揚儀真迺洄而上龍潭浦口望風奔潰比至金川啓關納款以故留都守禦舟師爲急藩垣之固專倚江北徐賴跨中原瓜連數省淮安控徐揚

魯齊文武重臣開府作鎮雖職兼漕撫而聯絡兩
京廬民多游手野有遺利鳳陽高墻陵墓供億繕
葺財力冗費豐沛之間濁河泛濫幾淪魚鱉轉餉
旣艱民亦凋瘵決嚙之患濠泗尤棘揚有離臺富
商走集民頗豐洽俗亦浮靡瀕湖農田塗墊爲患
江南安慶當長江委流東約全楚爲江表門戶蘇
松常三郡市浮於農文勝於質加之田賦不均稅
徭日困常征外坐派日煩沿海兵戍本以備倭而
太倉崇熟瀕海之民擅鹽魚之利間作弗靖出沒
江洋肆行剽劫以故江防海備並爲要職徽多山
少田民逐末利風俗用偷池在山麓江許多流冗
寇盜因以竄匿鎮江鑿山通漕海潮下上穀土歲
易利歸豪貴財盡貧冗矣湖廣跨有江漢武昌其
都會也南滙湖溪北擁原陸山高水濶効其靈秀
承天王氣獨萃焉鄖襄上走秦梁德黃下臨吳越
荆顧巴蜀辰扞雲貴郴桂通五嶺入八閩衡據南
岳之勝永寶之間謹備苗夷而已常德地廣民貧
漢陽土狹利薄岳州當洞庭之波仰資市利長沙
雖卑濕民物稱殷盛顧穀土泥塗甚於禹貢宗藩
賦祿廣於周封傳符紛紜流冗雜沓土酋橫強猶

復征調洞蠻草竊徒示羈縻皆足爲慮乃若民寡蓄儲官多徵集坐費財力益肆咎窳非明示休息恐未得安靖也浙江山海江湖所在限隔大海東蟠直轉淮陽重湖右滙波聯圻輔左逾信郡卽走江西南入閩關遂連甌越而杭州其都會也杭山水秀麗人慧俗奢衣被可觀米薪是急嘉湖寔與江東相表裏兩稅困人貧者流徙富者并兼海鹽之塘利害通於蘇松歲築歲傾勞費已甚安吉以西山越巢窟錯入廣德好訟喜鬪累興大獄至勤誅討笠澤之間鹽徒出沒剽掠村墟久之不治將

有隱憂嚴衢金華以徽饒爲郭郭生理爲優征徭亦簡寧紹温台並海而南達於汀漳賈客來往人獲其利寇至倉卒亦能爲禍倭夷貪市中國矯云奉貢風帆所指突至爲害幸嘉靖中革去市舶稍得息肩除戎之戒定海爲棘處人視他郡爲悍依山盜礦糾結四集激之易亂緩之難馴江西三面距山背沿江漢實爲吳楚閩越之交外折險阻中包壤地安危輕重常視他藩卽四方有事雖欲保境距兵勢難獨完南昌沂江滙湖右荆左浙帆檣所集江西一都會也九江獨據上流人有市利南

康臨彭蠡縮隘土瘠時有寇盜饒州稱爲裕阜廣
信傳道下邑殷盛撫州人悍多山寇而衣食自足
頗憂兼并建昌僻在東南卽有藩封亦稱安輯南
安贛州則汀漳雄韶山溪會焉林深谷邃寇賊淵
藪撫臣提兵牽制數省軍門之費不煩度支苟得
其人南服一壯鎮也袁州地逼長沙迪民客戶喜
獄好爭譏察旣難緩馴不易臨江瑞州素稱樂土
吉安山雄水秀人才輩出地利亦饒甲於諸郡大
抵江西之民質儉勤苦時有憂思至爭曲直持官
府卽費財不吝其土窄逐末不務稼穡至有棄妻

子經營四方老死不歸者福建海抱東南山聯西
北重關內阻羣溪交流雖封壤約束而山川秀美
福州其都會也福州及建寧以江浙爲藩人稠土
沃礦徒作孽波及建寧古田福寧利在魚鹽害亦
隨之汀漳山廣人稀外寇內逋與南贛聲勢聯絡
海物互市時起兵端人悍嗜利喜爭大抵漳州爲
劣興泉文物之盛甲於八閩地利亦豐人懷巽順
延平邵武事簡人淳雖沙尤之間或有小竊亦不
能爲大患河南當天下之中開封其都會也北下
衛漳達京圻東沿汴泗轉江淮車馬之達交於四

方雖險塞不及關中而水陸道里爲便彰德控趙魏懷慶走晉冀衛輝淇汲亦當傳孔河南嵩洛河華分陝要區蔽山南扼河北稱形勝焉汝寧南陽下蘄黃入襄鄖又與淮江相爲表裏顧分封日盛宗祿日繁民亦勞止睢陳歸德犬牙畿省轄管不能專奸人時竊發急之則潰逸四出彰德兵民雜集頗爲牽制河洛之間馮險鑄獵習於劔弩難馴易動若山川環互民物殷茂汝寧爲優陝西山河四塞神臯隩區也平涼固原豐茸平野監牧蕃滋鞏鳳之墟亦稱雄劇延慶沙葦蕭條而人士精勁

寧夏隔在河外別爲一區水穀之利亦足自養甘涼以西至於嘉峪左右番虜勢爲孤危洮岷西寧錯入羌族要在撫輯而已西安會府生理殷繁塞餉藩祿十居七八閭閻疾苦殆與他郡相當漢中西川襟喉潼關保障全陝並爲重地若乃茶之禁漸弛藩牧之地漸廣僕苑之畜漸耗異類之巢漸深斥堠之封漸感調弦改轍皆在所急河套之議至殘督府當徐圖之耳山東在兩都之間外引江淮內馮遼海西走趙魏北屆滄瀛而川陸孔道並會德州自海運旣廢此爲漕渠築塞疏濬舟車牽

挽勞役無休時兗州水潦爲虐疾苦滋甚青多礦
賊禁輯尤難公私交病成山沙門上下礁磧險毒
勢難輒議聞諸往蹟平度東南有南北新河南起
淮北安東北出海倉入北海不數日抵直沽勝國
濬治置閘通舟避開洋之險嘉靖中副使王獻修
濬有緒讒言中阻臨清濟寧有喉吭之憂此亦未
爲不知務也登萊僻在膠東三面距海利在魚鹽
蠶績農田亦足自贍且無海寇牧撫得人不失爲
樂土也山西表裏河山人稠地狹俗尚勤儉果毅
任氣北倚重邊極稱險塞自大同反側虜數入內

郡鴈門南北爲虜通衢今日所備不止河曲而已
山後礦徒河中屯卒上黨逋民亦非細故也嗟乎
山西四郡大同不足恃則太原危矣虜已獲利於
潞安其志時時在平陽每議禦虜輒云居庸紫荆
井陘置鴈門且不論况大同乎夫晉冀勞瘁卽無
虜患外轉塞儲內供藩祿猶不能支仰給鹽利當
是時而不早爲之所內憂方殷爾四川長川沃野
穀粟山林竹木蔬果織染之饒自足西屆番部南
阻蠻落雲棧之道北出褒斜瞿峽之流東下荆楚
坤維井絡斗絕諸夏實爲陸海而成都其會府也

山川綢繆防守爲易盜奸割據安輯爲難以故松
疊威茂安綿叙瀘重夔皆有兵憲蓋唇齒之勢利
在東南指臂之形險在西北或謂吐蕃寇自黎文
南詔賊由沉黎蕃詔糾合必由灌口蒐兵繕障玩
弛久矣劇盜起於重夔諸戎伺於臆臘烏撒悍於
隣夷龍州梗於餉道皆非細故也廣東在嶺海間
古稱樂土北負雄韶以臨吳楚東肩湖惠以制甌
閩內闕高廉以控交桂外藩雷瓊以扼黎夷廣州
山海包絡嶺南一都會也戍洋守嶂屯哨勞止韶
州嶺險谷平交廣咽喉南雄萬山三水控帶羣蠻

而督府兵餉九郡傳郵盡仰其權利惠州提封廣
袤悍客曠徒勢難收戢潮州沃野廣原昔所患者
輦戶斗老今則內寇外夷爲害棘矣肇慶據上游
當嶺西孔道高州海灣獐衢闢地除兵耕守並集
可也廉州層山曲水海北要區雷州炎徼多平田
腴壤逋夫藏命責在人牧瓊州有司並海五指腹
心反爲黎穴若乃濱海島夷之國以十數雖時時
出沒志在貿易非盜邊也顧人逐山海曠冶番舶
之利不務農田或尚剽掠行劫海上桴鼓之驚彌
滿山谷凡以生齒日繁徵求日困師旅數興漁獵

逖至通山之禁久弛餉軍之饋益煩也况夷珍珠窟本民用所興而公私交征反為民病廣西東南接廣東均在嶺南而風壤氣習異於廣東山高而秀水清而駛地利物產優贍自足則桂林其都會也若府江左江右江號為三江貫絡諸郡綿流甚遠苗夷附據肆為寇竊不但古田荔浦苦其蠶食而已潯州斷藤峽跨黔鬱江土蠻巢穴焉雖有屯戍未見摧輯柳慶號為盜區行居苦其荼毒設兵利將控馭督警之可無大患思恩田寧强悍久矣殘破之餘萌孽復作削土分官不為無策南寧大

平控遏兩江坐躡交趾寔為桂管保障梧州開府稍有兵卒地促人貧全仰東道然諸蠻咽吭列郡襟束形勢便矣雲南疊山崇峻瀉澗縈紆金碧米鹽之產亦稱精贍而雲南其一都會也臨安大理永昌鶴慶楚雄並稱沃壤設險守固輦內捍外則元江臨安路走南交金齒騰衝彊隣諸甸永寧麗江聯絡於瀾滄烏蠻蒙撒控彈於曲靖若尋甸上下風土絕異而兵衛漸疎矣大抵滇南取道貴陽稍有警動坐令梗絕城郭人民夷居十八緩則蜂屯蟻聚號令不行急則豕突鴟張勦誅未易苟緩

撫得人相與休息本無禍變顧萬里投宦類無固志時聞蠢動咎有由矣貴州本隸川湖雲南建省設官始於永樂十一年緣田酋倡亂旅拒朝命誅討既行始置郡縣官雜土流而思州思南三十九長官司者地本蠻夷山多箐穴水不涵渟土無貨殖貧瘠已甚官戎歲給全仰他省加以兵荒匱乏弗繼况省城會區咫尺夷土西南諸郡苦於嶺賊患南石阡銅仁界在川湖鎮筰西播夷峒間寇攘四出師旅數興境內諸酋亦皆好殺非因俗隨時先幾撫定未易爲力也

水土風氣

子夏曰商聞山書曰地東西爲緯南北爲經山爲積德川爲積刑高者爲生下者爲死丘陵爲牡川谷爲牝蚌蛤龜珠與月盈虛是故堅土之人剛弱土之人柔墟土之人大沙土之人細息土之人美垆土之人醜羽蟲三百有六十而鳳爲之長毛蟲三百有六十而麟爲之長甲蟲三百有六十而龜爲之長鱗蟲三百有六十而龍爲之長倮蟲三百有六十而人爲之長

倮一作羸倮中官土屬也

敢問其皆然乎

孔子曰然吾聞諸老聃亦如子之言也

爾雅云距齊州以南戴日爲丹穴北戴斗極爲空
同戴東至日所出爲太平西至日所入爲太蒙卽
也太平之人仁丹穴之人智太蒙之人信空同之
人武

管子曰水具材也又曰齊之水道躁而復故其民
貪麤而好勇楚之水淖弱而清故其民輕果而賊
越之水濁重而均故其民愚疾而妬秦之水泔最
而稽淤滯而雜故其民貪戾罔而好事齊晉之水
枯旱而運淤滯而雜故其民諂諛而謀詐巧佞而
好利燕之水萃下而弱沉滯而雜故其民愚驕而
好貞輕疾而易死宋之水輕勁而清故其民簡易
而好正是以聖人之化世也其解在水故水一則
人心正水清則民心易是以聖人之化世也不人
告也不戶說也其樞在水謂繫水土之風氣也

淮南子凡地形東西爲緯南北爲經山爲積德川
爲積刑高者爲生下者爲死丘陵爲牡谿谷爲牝
水圓折者有珠方折者有玉清水有黃金龍淵有
玉英土地各以其類生是故山氣多男澤氣多女
障氣多暗風氣多聾林氣多癘木氣多偃岸下氣
多腫石氣多力險阻氣多瘿暑氣多天寒氣多壽

谷氣多痺丘氣多狂衍氣多仁陵氣多貪輕土多利重土多遲清水音小濁水音大湍水人輕遲水人重中土多聖人皆象其氣皆應其類是故堅土人剛弱土人肥壚土人大沙土人細息土人美耗土人醜食水者善游能寒食土者無心而慧食木者多力而彘食草者善走而愚食葉者有絲而蛾食肉者勇敢而悍食氣者神明而壽食谷者知慧而天不食者不死而神

洞天福地

十大洞天者王屋委羽西城西玄青城赤城羅浮

句曲林屋括蒼是也三十六洞天則霍林蓬玄朱陵總真玄司真虛陵大妙洞虛詠真丹山赤水極玄陽明德玄天寶極玄好生上元天柱司玄昇真化玄貴玄司真空城太玉太秀法樂長耀寶光太上寶玄秀樂長真玉闕寶圭湘真太虛洞陽隱觀玄真太元大酉妙華金庭崇妙丹霞仙都祈仙青田大鶴大滌玄盖朱湖太生良常方會白馬玄光金華洞光紫玄洞冥皆有真仙主之七十二福地則地肺仙源玉瑠青嶼崆峒郁木坑武當君山桂源靈墟沃洲天姥岑若耶溪巫山青遠東白安山

馬嶺鷲羊洞真壇洞宮玉清壇靈源陶山爛柯龍
虎穴勒溪靈應白水源金精閣阜始豐逍遙東白
源鉢池論山毛公壇九華桐栢平都綠蘿章觀抱
犢大面虎溪元晨德山鷄籠玉峰商谷張公洞長
白中條霍山雲山四明緱氏臨邛少室翠微大隱
白鹿天柱大若巖嶠山西白天印金城三皇井沃
壤三十六精廬綿竹紫蓋瀘水丹陵守玄靈淨送
仙契靜凌虛鳳凰子真玄性契玄啓玄出谷君平
斗山光天眼德尋玄得一啓靈宗華朝真黃堂迎
真招隱紫虛啓聖啓靈鳳臺東華祈仙元陽東蒙

貞陽右皆有仙真脩煉之跡

茅君傳羅浮山洞名朱明曜真之天西玄三山洞
名玉玄極真之天括蒼山洞名成德隱玄之天句
曲山洞名式德華陽之天王屋山洞名小有清靈
之天赤城丹山洞名上王清平之天西城洞名太
玄超得之天林屋洞名左神幽墟之天青城山洞
名寶仙九室之天委羽山洞名大有真明之天

天竺

或問天竺國去處極闊朱子曰以崑崙山言之天
竺直崑崙之正南所以土地濶而所生亦多異人

佛書說阿耨山者卽崑崙也云山頂有阿耨大池
水分流爲四入中國者爲黃河入東海其三面各
入南西北海佛書有云中國爲南瞻部州天竺諸
國皆在南瞻部州東弗于逮西瞿耶尼北鬱單越
亦如鄒衍所說赤縣之類四州統名娑婆世界如
是世界凡有幾所而娑婆世界獨居其中其形正
圓故所生人物亦獨圓正象其地形蓋得天地之
中氣其他世界則形皆偏側尖缺而環處娑婆世
界之外不得天地之正氣故所生人物亦多不正

釋迦方域志序

吳氏萊曰終南山僧道宣嘗著釋迦方域志二卷
言西域諸國佛經行乞食營建塔廟處與其風土
物產甚悉文又足以發之唐藝文志載其目予始
從學佛者游頗究其所爲志者蓋漢之初世烏孫
大月氏本在燉煌祈連間匈奴冒頓攻大月氏大
月氏西走破塞王奪其居地而塞王南居罽賓塞
種分散自疏勒以西休屠捐毒之屬皆故塞種顏
師古曰塞今釋種也塞釋聲相近大月氏旣居故
塞王地烏孫昆莫又擊破之而大月氏西徙大夏
故烏孫民有塞種大月氏種休屠捐毒國絕小依

葱嶺而居民俗衣服又多類烏孫張騫云在大夏時賈人往市身毒得邛竹杖蜀布身毒居大夏東南有蜀物度去里不遠上乃令自蜀發閭使四道並出指求身毒率爲西南夷所閉不得通李奇曰身毒一名天篤卽今浮屠胡也按此身毒塞種之捐毒也捐毒治衍敦谷西北至大宛九百二十里西至大夏千有六百一十里故大夏賈人云在其東南虛稱里數至於百千欲以誇漢使爲遠實一國也漢西域傳止載捐毒而張騫傳乃引身毒要之烏孫所治赤谷本塞王故國東去長安八千九百里而近漢擊匈奴收休屠王祭天金人金人蓋今佛氏遺像休屠王漢張掖郡地將近故塞國也而身毒及東漢又稱天竺摩騰王法蘭之徒始持白氎之像及所譯四十二章到洛楚王英乃首盛齋戒之祀范曄曰佛道神化與自身毒二漢方志莫有稱者然則身毒本葱嶺間小國後漸大或爲他國所併仍冒舊國之號葱嶺以西乃爲塞種葱嶺以東多是雜胡亦不待辨而可知者也及唐之盛天竺有五方制萬里號爲大國東天竺乃與雪山吐蕃分界北天竺直接突厥塞王所居罽賓隋

唐之間別曰漕或曰矩吒且在西天竺之列東南海外扶南林邑又南天竺之隣境也今方域志殊不詳始本塞種獨稱中印度天竺之梵言猶捐毒也至謂其道則已幾徧天地之所覆載與夫貫古今而不可終窮者吁怪矣哉先王之世道德同風俗一文爲制度悉已定奇言鬼行淫巧異技之人卒不自容於執法之吏去古日遠民不見聖甚則立枯抱石以爲行髡首裸身以爲飾或曰是方外之士也至於傷教害義亂大倫而猶不少顧及漢而後天竺浮屠之教熾然乘之達賢君子及受其法又文以老莊列子之旨且曰史蘇嘗紀其異矣仲尼亦嘗許其聖矣何不可者吁西極之多幻也世之政教陵夷民惟異物之是遷宋何承天善天文星曆而胡僧所論冬至日晷與天竺占異周白蘇祇婆善胡琵琶一均之中間有七聲則又得之西域於是西涼龜茲之樂陳於立部婆羅門九執之曆厠於大行甚者周孔與釋迦並稱亦母慮乎書革旁行而與韋編鐵槌之經混爲一錄也雖然天地之一氣旣朕而萬形有變化容者羽者毛者鱗者介根莖者浮生者而恒出入於一機區

沈氏學引 卷之三
已別矣安在其精靈之起滅因報之相尋哉夫何造化之功用陰陽之屈伸又與吾儒惑也傳曰五帝以前無傳人又曰六合之外聖人存而不議今浮屠氏乃索言之始於無所始也窮於無所窮也殆有出於心志耳目之所不能及者吁怪矣哉自漢宣元以後西域服從於是土地山川王侯戶數道里遠近詳實可考隋唐之世裴矩賈耽則又皆圖而志之若夫道宣之作本爲其徒設也吾見其與前史有異故特爲紀地理者述其槩焉

第二卷 終

